

NAPLAN 2026.

Informacije za roditelje i staratelje



Zašto učenici rade NAPLAN?

Nacionalni program ocjenjivanja iz pismenosti i računanja (NAPLAN) je provjera pismenosti i matematike koju učenici 3., 5., 7. i 9. razreda polažu svake godine. To je jedina nacionalna procjena koju imaju priliku polagati svi učenici Australije.

Kako učenici napreduju iz godine u godinu, važno je provjeriti koliko su ovladali osnovnim vještinama čitanja, pisanja i računanja.

NAPLAN procjenjuje vještine iz pismenosti i matematike koje učenici stiču po školskom programu, a koji omogućava roditeljima i starateljima da vide kako njihovo dijete napreduje u odnosu na nacionalne standarde znanja.

NAPLAN je samo jedan aspekt školskog procesa ocjenjivanja i izvještavanja. On ne zamjenjuje stalne procjene koje nastavnici vrše o uspjehu učenika, ali može pružiti nastavnicima više informacija o napretku u obrazovanju učenika.

NAPLAN također pruža školama, obrazovnim vlastima i vladama informacije o tome kako funkcionišu obrazovni programi i da li mladi Australci postižu važne obrazovne rezultate u pismenosti i matematici.

Vaše dijete će raditi NAPLAN testove online

Online NAPLAN testovi su dizajnirani tako da daju precizne rezultate i da su zanimljivi za učenike. Testovi su podesivi (ili prilagodljivi), što znači da svaki test sadrži pitanja koja mogu biti lakša ili teža u zavisnosti od odgovora učenika. Ovo pomaže učenicima da nastave s učešćem u procjeni.

Prilagođeno testiranje omogućava ocjenjivanje šireg spektra sposobnosti učenika i preciznije mjerenje postignutog uspjeha učenika. Ukupan rezultat NAPLAN-a učenika zasniva se na broju i složenosti pitanja na koja odgovore tačno. Dijete ne treba biti zabrinuto ako mu pitanja budu teška; možda ulazi u složeniji put testiranja.

Svi učenici trećeg razreda će i dalje raditi pismeni test na papiru.

Šta ocjenjuje NAPLAN?

NAPLAN procjenjuje vještine pismenosti i matematike koje učenici uče u svom redovnom školskom programu.

Učenici polažu testove iz pisanja, čitanja, jezičnih konvencija (pravopis - spelling, gramatika i interpunkcija) i računanja. Pitanjima se ocjenjuje sadržaj koji je usklađen s australskim nastavnim planom i programom: engleski i matematika.

Sva vladina i nevladina obrazovna tijela doprinose razvoju materijala NAPLAN testova.

Da saznate više o NAPLAN-u, posjetite nap.edu.au.

Učestvovanje u NAPLAN-u

NAPLAN je za sve učenike 3., 5., 7. i 9. razreda. ACARA podržava inkluzivno testiranje, tako da svi učenici imaju priliku da učestvuju u nacionalnom programu ocjenjivanja.

Informacije o prilagođavanjima dostupnim za učenike sa invaliditetom koji imaju različite funkcionalne sposobnosti i potrebe nalaze se u **Nacionalnim protokolima za sprovođenje testova**.

Škole trebaju raditi sa roditeljima, starateljima i učenicima kako bi identifikovale, na bazi svakog pojedinačnog slučaja, razumna prilagođavanja koja su potrebna kako bi pojedini učenici s invaliditetom pristupili NAPLAN-u.

Za pomoć u donošenju ovih odluka, možete konsultovati internet stranice Nacionalni protokoli za sprovođenje testova (poveznica / link iznad), **javnu NAPLAN demo stranicu, Vodič za škole - kako pomoći učenicima sa invaliditetom da pristupe NAPLAN-u, ili našu seriju video zapisa** u kojima roditelji/staratelji, nastavnici i učenici dijele svoja iskustva u korištenju NAPLAN prilagođavanja.

U izuzetnim okolnostima, učeniku s invaliditetom koji ozbiljno ograničava njegovu sposobnost da učestvuje u ocjenjivanju, ili učeniku koji je nedavno stigao u Australiju i ne govori engleski, može se odobriti formalno izuzeće.

Direktor škole i lokalni organ za provođenje testiranja mogu vam dati više informacija o prilagođavanjima za učenike s invaliditetom ili procesu koji je potreban za dobivanje formalnog izuzeća.

Šta ako moje dijete izostane iz škole u danima NAPLAN testa?

Ako je to moguće, škole mogu organizovati da pojedini učenici koji su odsutni u vrijeme testiranja urade propuštene testove u neko drugo vrijeme tokom školskog rasporeda testiranja.

Šta mogu uraditi da pomognem svom djetetu?

Od učenika se ne očekuje da uče za NAPLAN. Možete pružiti podršku svom djetetu tako što ćete mu reći da je NAPLAN sastavni dio školskog programa i podsjetiti ga da jednostavno dâ sve od sebe. Neka objašnjenja o NAPLAN-u su korisna jer pomažu da učenici shvate i da se osjećaju ugodno s formatom testova. Međutim, nije neophodno da to čine roditelji / staratelji. Nastavnici će osigurati da učenici budu upoznati sa vrstama pitanja u testovima i pružit će im odgovarajuću podršku i smjernice.

ACARA ne preporučuje pretjeranu pripremu za NAPLAN ili korištenje usluga privatne poduke.

Pogledajte vrste pitanja i alate koji su dostupni u online NAPLAN procjenama na [javnoj NAP demo stranici](#).

Kako se izvještava uspjeh mog djeteta?

Rezultati NAPLAN-a se izvještavaju prema standardima stručnosti. Postoji standard za svaku oblast procjene po razredima / godinama. Standardi znanja pružaju jasne informacije o uspjehu učenika. Oni su postavljeni na izazovan, ali razuman nivo koji se očekuje od djeteta u vrijeme NAPLAN testiranja, a temelje se, uglavnom, na materijalu podučavanom u prethodnim godinama školovanja.

Uspjeh učenika prikazan je u odnosu na 4 nivoa znanja: Izvanredan, Snažan, U razvoju i Potrebna je dodatna pomoć.

Škola će dostaviti pojedinačni NAPLAN izvještaj učenika kasnije te godine. Ako ne dobijete izvještaj, obratite se školi svog djeteta. Ako vam je potrebna dodatna pomoć, trebali biste se obratiti nadležnom tijelu za provođenje testova u vašoj državi ili teritoriji. ACARA ne može dostavljati pojedinačne izvještaje.

Kako se koriste NAPLAN rezultati?

- Učenici, roditelji i staratelji mogu koristiti pojedinačne rezultate da razgovaraju o napretku sa nastavnicima.
- Nastavnici koriste rezultate kako bi pomogli u identifikaciji učenika kojima su potrebni veći izazovi ili dodatna podrška.
- Škole koriste rezultate da utvrde u čemu su dobri, nastavne oblasti i programe koje treba poboljšati, te da odrede nove ciljeve za unapređenje pismenosti i matematike.
- Školski sistemi koriste rezultate za preispitivanje efikasnosti programa i podršku koja se nudi školama.
- Ostali mogu vidjeti informacije o uspjehu škola kasnije na myschool.edu.au.

Gdje mogu dobiti više informacija?

Za više informacija o NAPLAN-u:

- kontaktirajte školu svog djeteta
- kontaktirajte lokalni organ za provođenje testiranja na nap.edu.au/TAA
- posjetite nap.edu.au

Da saznate kako ACARA postupa s ličnim podacima korištenim za NAPLAN testiranje, posjetite nap.edu.au/naplan/privacy.

Raspored NAPLAN-a

Period NAPLAN testiranja traje devet dana. Ovo je da bi se izišlo u susret školama koje možda nemaju kapacitet da završe testove u kraćem vremenskom roku. **Period NAPLAN testiranja počinje u srijedu, 11. marta 2026. godine, a završava se u ponedjeljak, 23. marta 2026. godine.** Škole **moraju** zakazati testiranje što je prije moguće u okviru perioda testiranja, s prioritetom u prvoj sedmici.

Test	Zahtjevi za planiranje	Trajanje	Opis testa
Pisanje	Učenici trećeg razreda moraju odraditi pismeni test na papiru već prvog dana Pisanje u 5., 7. i 9. razredu mora početi prvog dana (škole moraju dati prioritet pisanju 1. dana, s tim da se 2. dan koristi samo ako postoje tehničke/logističke poteškoće)	3. razred: 40 min. 5. razred: 42 min. 7. razred: 42 min. 9. razred: 42 min.	Učenicima se daje ideja ili tema koja se zove stimulacija za pisanje (ili podsticaj) i traži se da napišu odgovor u određenom žanru (narativno ili ubjedljivo pisanje)
Čitanje	Treba se uraditi nakon testa iz pisanja	3. razred: 45 min. 5. razred: 50 min. 7. razred: 65 min. 9. razred: 65 min.	Učenici će pročitati niz informativnih, maštovitih i ubjedljivih tekstova, a zatim odgovarati na pitanja u vezi s pročitanim
Jezičke konvencije	Radi se nakon testa čitanja	3 razred: 45 min. 5 razred: 45 min. 7 razred: 45 min. 9 razred: 45 min.	Učenici se ocjenjuju iz pravopisa, gramatike i interpunkcije
Matematika	Radi se nakon testa jezičkih konvencija	3 razred: 45 min. 5 razred: 50 min. 7 razred: 65 min. 9 razred: 65 min.	Učenici se ocjenjuju iz brojeva i algebre, mjerenja i geometrije, te statistike i vjerovatnoće